

Monumentenraad ta conseha pa drecha e edificio:

TRES LUNA DI TEMPO PA DOÑONAN DI NO.1 STORE A YEGA NA SOLUCION

ORANJESTAD (AAN) -- DIARIO tin entendi cu recientemente e doñonan di e edificio di e antiguo No.1 Store a reunion cu director di D.O.W ya cu gobierno kier urgi e dos famianan cu tin parti den e propiedad pa haci algo cune, ya cu e condicion antihigienico di e lugar ta birando cada vez peor, y ta crea disgusto pa nos propio comunidad, como tambe un mal imagen dilanti turistanan.

Manera ta conoci ambos familia propietario for di basta aña tin problema cu otro, cu no por a yega na un entendimiento. Mientras cu un di nan kier pa basha e edificio abao, Monumentenraad ta prefera pa nan dreche ya cu

ta un construccion antiguo y ta un lastima pa deshaci di dje.

Aparentemente gobierno a duna e famianan involvi 3 luna di tempo pa yega na un solucion definitivo, y awor ta parece cu nan ta negociando cu otro.

En todo caso, e fundacion pa cuido di monumento ta considera e edificio en cuestion un monumento nacional, y nan no kier mira demolicion como unico alternativa.

Mirando cu e ta hopi central por vislumbra cu si nan drecha e edificio pa huur e, pa oficinanan, por ehemplo, sigur lo tin basta hende interesa den dje.

Por imagina cu una bez cu tuma un decision y si esey no

ta demolicion, hasta departamento di sanidad lo mester cay aden despues di tanto aña cu e lugar ta abandona, y manera tur hende por mira e ta yen cu sushi di paloma, y posiblemente infesta cu

pieu.

No sin razon, diferente comerciante den e vecindario ey den diferente oportunidad a protesta. Ta di spera cu pronto lo bin un solucion definitivo.